

比丘避女惡名欲自殺經

西晉沙門釋法炬譯

如是我聞一時佛住舍衛國祇樹給孤獨園
時有異比丘在拘薩羅人間住一林中時彼
比丘與長者婦女嬉戲起惡名聲時彼比丘
作是念我今不應共他婦女起惡名聲我今
欲於此林中自殺時彼林中正住天神作是
念惡不善不類此比丘不壞無過而於林中
欲自殺身我今當往方便開悟時彼天神化
作長者女身語比丘言於諸巷路四衢道中

世間諸人爲我及汝起惡名聲言我與汝共
相習近作不正事已有惡名今可還俗共相
娛樂比丘答言以彼里巷四衢道中爲我與
汝起惡名聲共相習近爲不正事我今且自
殺身時彼天神還復天身而說偈言

雖聞多惡名 苦行者忍之 不應苦自害
亦不應起惱 聞聲恐怖者 是則林中獸
是輕躁衆生 不成出家法 仁者當堪耐
下中上惡聲 執心堅住者 是則出家法
不由他人語 令汝成劫賊 亦不由他語

令汝得羅漢 如汝自知已 諸天亦復知
爾時比丘爲彼天神所開悟已專精思惟斷
除煩惱得阿羅漢

比丘避女惡名欲自殺經

孝九

十三

佛說身觀經

西晉三藏法師竺法護譯

聞如是一時佛在舍衛國祇樹給孤獨園是
時佛告諸比丘是身有肌膚髓血生肉含滿
屎尿自視身見何等好常有九孔惡病常不

淨常洗可足慙常與怨家合爲至老死亦與
病俱何以不惡身會當墮會當敗以棄屍地
中不復用爲狐狼所噉何以見是不慙誰說
貪婬如佛言少樂多罪自心觀是如屠孟屠
几爲骨聚如然熾火如毒藥痛爲旋癡人喜
爲喜不自知何以不畏羅網貪婬爲癡財錢
穀金銀牛馬奴婢人爲命故求命在呼吸本
命亦自少極壽百餘歲亦苦合會觀是誰爲
可者如時過去便命稍少命日俱盡如疾河
水如日月盡命疾是過去人命去不復還如